

05/09/2001

Yang di-Pertuan Agong rasmi Sukan Sea XXI

YANG di-Pertuan Agong Sultan Salahuddin Abdul Aziz Shah akan merasmikan Sukan Sea ke-21 di Stadium Nasional di Bukit Jalil, Sabtu ini.

Seri Paduka Baginda dijadual tiba di stadium pada 8.10 malam dengan diiringi Raja Permaisuri Agong Tuanku Siti Aishah.

Perdana Menteri, Datuk Seri Dr Mahathir Mohamad dan isteri, Datin Seri Dr Siti Hasmah Mohd Ali, Timbalan Perdana Menteri, Datuk Seri Abdullah Ahmad Badawi dan isteri serta menteri kabinet dijangka hadir bersama-sama juga dengan jemputan dari sembilan negara peserta lain.

Upacara perasmian akan bermula dengan persembahan seni mempertahankan diri serta acara payung terjun, diikuti perbarisan kesemua 10 kontinjen dan juga perarakan bendera Persekutuan Sukan Asia Tenggara (SGF).

Presiden SGF, Tan Sri Tunku Imran Tuanku Ja'afar yang juga Presiden Majlis Olimpik (MOM) akan memberikan kata-kata aluan sebelum Menteri Belia dan Sukan, Datuk Hishammuddin Tun Hussein menyampaikan ucapannya selaku pengerusi jawatankuasa penganjur.

(END)